



ATASSUT

UKA 2016/121

Steen Lyngé

06. 10. 2016

Uunga siunnersuut: Atuarfik pillugu Inatsisartut inatsisaata allanngortinneqarnera pillugu Inatsisartut Inatsisaat nr. xx, xx.xx 2016-imeersoq (Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Atassut-mit nuannaarutigeqisatsinnik ukiuni makkunani, ingammik uani qiningaaffimmi Meeqqat Atuarfiat Naalakkersuisunikkut inatsisartunilu suliaqarnermi soqutigineqarnera annertusiartortoq maluginiarparput.

Innuttaasoq inuunerissaarnissaminik tunngavilerneqartarpoq, angerlarsimavimmini pitsaasumik toqqisisimanartunillu atugassaqarsimaguni minnerunngitsumillu atuartitaanikkut pitsaasumik tunngavissinneqarsimaguni.

Misissuinerit takutittaannarpaat innuk peqqissutsimigut inuunerissaarnissaminullu tunngavilerneqartarpoq atuartitaanikkut pitsaasumik tunuliaqutaqaraangami. Taamaammat nunatsinni meeqqat tunngavissilluarneqarnissaannut suliniutit suut tamaasa tapersorsorneqartariaqarput aammalu inerisarneqartuarlutik.

Atassut-mit ukiuni amerlasuuni meeqqat atuarfiat pillugu sorsuuteqartuarsimavugut, taamaammat nuannaarutigaarput Naalakkersuisut maanna siunnersuutigimmassuk pilersitsisoqassasoq angajoqqaat aallartitaqarfissaannik. Siunnersuummi siunertaavoq atuarfeqarnermi apeqqutit pingaaruteqartut pillugit angajoqqaat isumaannik ataatsimut nalunaaruteqarfissaannik pilersitsinissaq.

Siunnersuutip tunaartaraa, meeqqat atuarfiat pillugu angajoqqaat ataatsimut isummersuutaannik katersisinnanissaq, taamaaliornikkut meeqqat atuarfiat suli pitsanngorsarnissaanut suliniutit tunngavilersinnaaqullugit.

Atassut-mit siunnersuut nuannaarutigigaluarlutigu, Angajoqqaat Aallartitaqarfiata aamma meeqqanut suli atualinngitsunut paaqqinnittarfiit (qallunaatut taaneqartartut vuggestue-t aammalu børnehave-t) pillugit aallartitaqarfittut aamma atuuttariaqartoq, Atassut-mit isumaqarpugut.

Meeqqat atuarfiini aallartittut pisinnaasaat aammalu piareersarnerat meeqqat paaqqinnittarfiini tunngavilerneqartarmat, taamat Atassut-mit siunnersuummut ilassutissatut nalilersuinissaq kissaatigaarput.

Taamatut naatsunnguamik oqaaseqarluta Atassut-mit kissaatigaarput siunnersuutip ataatsimiitsitaliamut ingerlateqqinneqassasoq, ilaatigut Angajoqqaat Aallartitaqarfiata aamma paaqqinnittarfiit pillugit suliaqarnissaanik ilaatsinissamik kissaateqarnerput nalilersorneqassasoq.